

Sunday, July 27, 2025

Time - 2:30pm - 2:35pm

AKASHVANI AIZAWL

REGIONAL NEWS BULLETIN

(MIDDAY)



CHAMPHAI YMA

Champhai YMA sub-headquarters chuan an district huamchhunga Myanmar raltlan awmte chu chibil pawl din lo turin a hriattir.

Tun hnai a Champhai Sub Headquarters YMA-in Champhai district huam chhunga Myanmar raltlan awmte tana inkaihhruaina a tihchhuahah chibil pawl din a khap a. Raltlan, sorkar leh khawtlang duh loh thil (ruihhlo leh thil dang) lakah an inhnamhnawih tur a ni lo va, chutianga inhnamhnawih man an nih chuan Jail-a dah an nih pawhin hremna an tawrh zawh hnuah Myanmar ramah thawh haw an nih tur thu an tarlang a. Ruihhlo hmanga sumdawnnaa inhnamhnawih, roreltute hnen thleng kher lo pawh anmahni khaw lamah thawh haw an ni ang a, chutiang mite chu an thlalak leh an hming social media-ah puanzar bawh tur a nih thu inkaihhruaina an siamah chuan an tarlang bawh.

YMA Champhai Sub-Headquarters thuchhuahah chuan raltlan reng reng an awmna YMA branch-ah an inziaklut vek tur a ni a. Hemi rual hian raltlan te reng rengin Myanmar sorkarin a siamsak Identity Card an kawh chu an awmna YMA branch-ah an an thehlut vek tur a ni, an ti bawh a,raltlante schuan Ram dan leh vengchhung dan an zawm tur a ni a, an zawm lo a nih chuan an chungah eng ang rorelna pawh thleng se an sawibuai thei lovang a, an awmhmun an sawn duh a nih chuan an awmna hmasa YMA Branch an hriattir ang a. Branch hrutut an insawna tur Branch-ah ziakin an hriattir tur a ni. Branch tin in raltlante chhinchhiahna inangtlang neih tur a ni a, thla 3 danah mahni huam chhunga raltlan neih zat report thin tur a ni.

Sub-Headquarters YMA, Champhai huam chhungah sawrkar atanga phalna lak ngai chi sumdawna reng reng raltlan ten an kalpui tur a ni lova. Anmahni pualin lirthei hmanga sumdawna an kalpui tur a ni lo, an ti a. In hmun lo ram an neih phal a ni lova, lo nei an awm hriat a nih pawhin an neih lohna tura hmalak a nih tur thu Sub-Hqrs YMA Raltlan Kaihhruaina duan chuan a tarlang a,raltlan chhiattawh an awmin an awmna vengah vui tur a nih chuan mikhual vuia vui tur a ni ang a, chhiatni fund erawh chu khawn tur a nih thu an sawi bawh a ni.



CHAMPHAI DRUG SEIZURE

Champhai district Police-ten chuan kumin January ni 1 atanga kar hmasa Zirtawpni, July ni 25 thleng khan ruihhlo heroin leh methamphetamine cheng vaibelchhe 12 leh nuai 62 chuang hu an man tawh.

Champhai district Police-te hian Narcotic Drugs & Psychotropic Substances Act, 1985 tlawhchhanin thubuai 8 ziaak lutin, he mi kaihhnawihah hian mi 17 an man tawh a. An hnen aţang hian Heroin kg 7 leh gram 855 bakah Methamphetamine kg 78 leh gram 95 an man a. An ruihhlo man hlut zawng hi cheng vaibelchhe 12 leh nuai 62 chuang hu niin an sawi. Hetih rual hian Zokhawthar Police Station a thawkten July ni 10 khan Mizorama la hmuh ngai loh heroin quality sang bik, Double Uoglobe Band an tih mai tlawn 20, kg 7 leh gram 422 a rit chu Zokhawthar khaw bula Kudamsen Kai-ah man ani a, an ruihhlo man kaihhnawihah hian mi panga man an ni. He ruihhlo an man hi Asia Pacific biala ruihhlo sumdawnna hmun hrang hranga hriat lar tak a nih thu an tarlang. He mi hun chhung vek hian Champhai district Excise & Narcotics Department hnathawkte chuan ruihhlo kaihhnawih thubuai 12 ziaak lutin, mi 15 an man a. An hnen aţang hian Heroin Kg 1 leh gram 559 bakah Methamphetamine kg 11 leh gram 21 an man bawk a ni.

Champhai district Excise & Narcotics Department hnathawkte hian July thla chhungin ruihhlo that lohzia puanzarna beihpui thlakin, tum hnih Naupang Sunday School, Presbyterian Church, New Champhaiah leh Govt. Vengthlang Middle School, Champhaiah te an buatsaih bawk a ni. Assam Rifles pawhin ruihhlo leh a kaihhnawihah dan chah a ni theih na'n chak tak a hma lain tum engngemawzat an thawk chhuak a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Zanin dar 6 leh a chanve-ah Chanchinthar puan leh a ni ang.



MANN KI BAAT

Prime Minister Narendra Modi-a'n naupangte zinga thil thar siam chhuah duhna, Inspire-MANAK campaign kalpui mek a ni, a ti. Vawiin Akashvani-a Mann Ki Baat hun a hmannaah he thu hi sawiin hemi atan hian sikul tin atangin naupang 5 zel thlan chhuah an ni, a ti a, naupang nuai telin an zawm tawh a ni, a ti bawk.

Kum zabi 21-naah hian science lamah India-in chak takin hma a sawn tih sawiin tunhnai lawkah pawh chemistry lama khawvel huap inelna, International Chemistry Olympiad-ah India zirlaiten medal an la thei a ni, a ti a, Australia rama International Mathematical Olympiad-ah pawh India aiawha tel zirlaiten gold medal 3, silver 2 leh bronze medal 1 an la a ni, a ti.

Thla thar August-a Mumbai-a Astronomy & Astrophysics Olympiad neih tur chungchang pawh sawiin he inelnaah hian ram 60 chuang atangin zirlaite bakah

scientist-te an tel dawn a ni, a ti a, hei hi Olympiad lian ber a ni dawn tih a sawi bawk.

